

簡
學
齋
詩
存

道光甲辰夏月晤小筋太史於都門出其尊人秋
舫先生詩集一編披讀數過卓乎漢唐人手筆諸
家評語亦皆精當欣佩無似憶道光辛巳年關月
生孝廉就瀋陽講席將出山海關先生於月生爲
甥舅行送之以詩云三年客裏不曾離我昨南歸
汝淚垂今我北來剛一月又逢送汝出關時春草
春花滿 帝城可堪仗策事孤征燕臺已覺離
家遠况隔燕臺十五程鴨綠江頭花覆煙時平壯
士罷屯田若非潦倒書生筆那得輕看塞外天敝

琴徧覓賞音難從此秋心孰與彈妬殺出關詩句
好下車先與陸生看其時獻正在桂香巖學使幕
中故末句及之他日獻來京先生云陸君陸公皆
不文非生不可似不妨引賈生之例耳此四章情
真語摯風骨清高不知編集中云何未載可見先
生詩遺佚者甚多獻初識先生係嘉慶丙子年在
汪均之與之昆季齋中先生在魏默深同年處見
獻擬古詩中有鸞鏡試新衣隔簾蝴蝶飛庭草枯
復青與君人離別兩聯頗爲歎賞此訂交之始已

卯秋獻就館出關先生贈以大毛裘雖古人解衣之雅亦無以過焉越年餘而先生歸自粵東又贈之以朱提五十其時以館穀尙豐固辭未受而感恩知己則未嘗一日忘懷也獻每過先生無不見見必商榷古今忽屢過而未得一見心竊疑之乃排闥入先生大笑語之曰吾近獲奇寶杜門謝客者數日今手鈔畢矣天下之寶當與天下共之不妨攜吾鈔本去手錄一過也奇寶非他乃儀部龔定菴所爲古文上下卷也先生好賢重友之誠如

此今汪均之與之昆季關月生龔定菴諸君俱歸
道山惟獻與魏默深尙留戀京華屈指舊交如晨
星寥落撫今思昔能無悵然且喜太史習其先人
之業而能世其家凡先生之有志焉而未逮者將
於太史期之也獨詩也乎哉五月二十一日丹徒
陸獻謹跋

讀秋舫詩知其懷抱深遠立心忠厚非徒欲以詩人自畫者也既與縱談果然所願秋舫力自淬精爲有用之學勿玩物以荒遠大詞章尤足損人意氣也况所懷益大則詩亦自能醇厚深遠第於詩求之淺矣三卷以前猶見使才語露痕迹四卷以後則益進樸至多有得之言按之皆有典要其內泊如也其外闊如也益以蘊釀何難繼風人之義耶丙子六月借讀三日敬悅非可語譬謹識所能見及者歸之均之汪正鑒拜書於自訟之室

幽嶺石古曉江春濃連檣飛度好夢屢逢嘉慶二
十一年六月晤秋舫於都門出示秋舫詩鈔七卷
塵事紛紜恩恩未暇讀也越二日秋舫見予詩况
遂索所以况秋舫詩者因閉門靜讀一過敬識四
語可以盡秋舫之詩矣未能盡秋舫之人也六月
二十一日灸之汪正榮記

秋舫之詩好命余閱至此本凡三次矣其改詩如
改過虛心實力無留難焉故其稿凡三易每易輒
勝其爲卷凡三而亦每卷必進然秋舫近詩之進

則不於詩中得之矣。自狂狷不似中行而鄉原者，似之而聖人之去取特異。蓋真僞之閒相去至微，而不可以道里計也。論詩必三百篇，聞者罕不大噤而不知。自從刪後，更無詩。非其體製格律之不同，乃其本末真飾之迥絕也。秋舫更以其虛心實力嚴察而樸存之，使無一字非真誠流出而必三百篇焉。則讀者亦皆動其真誠而竟如三百篇矣。丁丑十月魏源讀謹跋。

余閱秋舫詩此其第四次矣。如羊角風轉而益上。

如白雪曲唱而愈高大抵甲戌年是其轉關丙子
後乃其進境其中甘苦曲折源一一能悉之學問
之道無窮而性情之故有本改詩如改過心虛而
力勇今願與秋舫益勉之己卯孟冬魏源校畢再
識

空山無人沈思獨往木葉盡脫石氣自青羚羊挂
角無迹可尋成連東海刺舟而去漁洋山人能言
之而不能爲之也秋舫其庶幾乎其庶幾乎壬午
季春魏源書於藤陰書屋

甲戌春余與秋舫定交京師初見其詩推爲船山
勁敵別纔五年精進若此卷中古體尤勝五言造
意深妙用力堅苦處殆非船山所能也七言才壯
而氣逸閒有一二浮句冗字惟固存而慎發之則
謹嚴中益見排夏當與昔賢抗衡千載况吾輩耶
承示又將出都索詩貺別卽題此卷附呈教正少
年搖筆吐長虹人海鶯花電埽空萬古居然迴腕
底一魁曾不介胸中青蓮祠畔金尊月黃鶴樓前
玉笛風料得懷人高詠地江天兀傲又孤蓬漁弟

吳嵩梁

水之大者風已定必有陰浪琴之古者響已徹必有泛聲陰浪彌勁泛聲最悠韋柳二公以是雄視百代作者其嗣響已盥誦再三爲之斂衽退避矣
道光壬午六月十二日安吳包世臣記

冲澹者其神真樸者其質詩品在蘇州道州之間不可以尋常畦徑求之諸體俱佳五古尤勝必傳無疑癸未中春敬堂姚學塽謹跋

秋舫天才俊亮落筆不能自休近更加以檢束駿

駿乎窺漢魏之門矣卷中多精悍之作如各有天地身攀附詎非耻一念靜躁閒終古霄壤侔皆見道語可以鍼頑立懦不當徒以詩人目之乙酉初春雲汀陶澍拜讀

外舅陳先生既歿越二十餘年其子小舫檢篋中所藏遺詩編次及朋選定者曰詩存其餘若干首爲詩刪以授梓人名豐襄讐校之役終卷而歎曰今之刻是編者使先生以詩傳非先生意也先生內行淳美於學無所不窺而篤好宋五子書詩則餘力爲之當嘉慶時登上第入翰林恬於進取交遊不過數人暨道光初年屢膺衡文之命所得皆知名士士林稱爲文宗官京師久祿薄不能迎養親將乞歸親聞之弗許名豐時尙幼見先

生端坐一室事圖籍外恆忽忽不樂私心竊以爲
憂乃無何而疾作年甫逾四十曾不得大用於世
至今有餘憾焉先生作詩多不自收拾是編斷自
己巳以後然少作爲一時傳誦者他人詩集雜記
中往往見之今所錄不及十之二三讀之者孝弟
之心油然而生然則先生雖以詩傳而不僅以詩
傳者自在也抑聞先生著述有近思錄補注十四
卷尤爲平生所得力董而理之上諸史館以
備儒林之採擇焉是則小舫之責也夫咸豐壬子

孟春堦葉名豐謹識

簡學齋詩存卷之一

斬水陳 沆秋舫

己巳

雜詩

太沖賦十載李白日萬言秦臣十書上晉掾三語
存文字非苟作有物乃足尊拙速輸巧遲真簡勝
僞繁兩閒粲已爛元氣爲之根

步兵逢人哭士龍見人笑二子在一堂忻忻有同
調大道皆近情奇禍由自召哭亦未免癡笑亦未

免傲君子秉正大懍懍修言貌

鐵佛寺一笠亭晚歸

黃葉飛時僧過江孤亭留我話秋窗暮禽歸樹人
歸郭煙外寒鐘獨自撞

長歌贈毛秀才青垣

國翰

自吾走南國於水見洞庭於山七十二峯見嶽衡
所思更在山水外欲得瑰奇礪礪之士與之共平
生少年結交徒意氣酒散不知誰姓名毛生褐衣
海上至矣兀疑是嶽之精往者見其詩使我夢想

不得甯今晨敲門詞硜硜見詩果不如見人高秋
九月風雨鳴江濤亂泊長沙城感時懷古一長嘯
裂石崩雲三服膺我疑君挾瀟湘氣忽然而來有
如秋濤萬里行忽然而止有如一瀉寒潮青不知
胸中波瀾幾萬頃飛落紙上浩汗終難平卽論作
人亦是古直者笑語落落實若詩懷清吁嗟大雅
忽不作壇坫久矣無光晶欲從衆蕪擢孤穎雖我
有志力未能愛君元氣滿懷抱願以此事歸性情
不見飢風挹沆瀣引吭不食求其朋

魏默深云忽然而來數句

似是作者

自道語

有感

聞廣東荒熟海寇未平

傳聞南海事全非十室炊煙九室稀須識治兵先

治吏自來防盜在防飢噩魚大可為文遣沙蜮終

難出水飛寒驚江湖風雪裏有人投筆念征衣

默深

云五六

舟行偶作

孤帆信風游水闊山漸遠不知舟行急但覺地勢轉篙觸底日閒吾亦興不淺卻緣急柁聲驚吠岸

旁犬

默深云游行自在

到家

笑指江邊屋來歸雪裏鴻年荒驚俗改歲暮見家
窮獨喜寒梅樹依然老院東水程三百里回首一

帆風

黃平黼云三四句善道世情如香山

庚午

大人命賦二首

賃屋歎

有田數畝西河渡有屋最近先人墓十年拋卻山

中雲卻向長沙賃屋住長沙富兒屋作田大屋月
租一萬錢窮官無錢住不得入門屢遭屋主逼有
時拍案怒且嗔驚我燕雛出復匿主人索錢不足
怪其如旅人甚矣憊兩月還君一月租三年累我
千金債吁嗟乎賃屋艱於買屋居私逋逼迫如公
逋信知窮客不可作何不歸去料理田中廬吁嗟
乎世閒寒士貧無屋每逢風雨凍折足今我賃屋
有屋居日受逼迫猶爲福

默深云結四語亦世人
所謂退一步想也然非

有懷抱能安命
者卻不解道

典衣行

世人無衣常苦寒我衣兼得謀饔飧
世人有衣惟恐敝我衣不得充篋笥
前年典狐裘使我忍凍如盤鳩
去年典羅葛使我觸熱猶披褐
典時容易取時難未冬先愁雨雪寒
典時新鮮取時舊幾番出入腰領
縐衣多錢亦多吾身雖敝腹易皤
衣少錢亦少區區能供幾日飽
將裘贖葛情可憐將葛贖裘不值錢
母錢隔歲能生子人不贖衣衣老矣
昨日有客千里來甕頭無酒廚無柴
阿母喚兒勿徘徊

徘徊可一醉頭上釵

默深云二首香山手筆衣老矣句妙妙

夜抵劉山人家

行到月斜處入門千竹林故人此高臥前日約相尋
雨過春如夢山空夜有音坐深無一語何以答同心

吳蘭雪云首四句合看始見標格賀耦庚云自然入妙

苗刀歌

金颼颼霜氣驕不醒不醉秋蕭騷蠻奴手持三尺刀爲我拂拭生寒濤此刀鑄自苗人手五月五日神飲酒臨水呪取黃蛟魂毒雨炎風爲父母憶

昨天兵下五溪將軍轉戰南荒低野苗殺人如
截泥取頭祭刀刀夜嘶彼刀雖然一當什不如我
刀智勝力事急爭來馬後降微生忽向刀前畢祇
今妖氣猶射人斑斑戰血痕疑新夜來髑髏哭山
雨繞刀索魂吹碧燐天生苗性好殺伐伯禹神兵
制不得安得溪崗化作田一時銷盡腰閒鐵

默深
云嘶

韻燐韻
奇警

辛未

宜鄉山中早行

一馬入雲際水聲灣復灣春風不到處桃花開一

山

耦庚云想見胸中灑落默深云中有元化

北行留別舍弟大雲

十年車馬逐風塵今日辭家又暮春仗爾多才能
養母憐予此去尙依人逢迎自愧無奇策出處須
知不辱身長路艱難休在念客中生計未嫌貧

舟過嘉魚有懷

古縣青山外輕帆細雨餘客程隨去雁春水落嘉
魚倚郭松身大沿江麥浪疎滄波迷望眼不見子

雲居

次蘭陽

人煙開夕照草木帶河聲沙輒便車路隄高過縣
城官程南北湊水道古今爭到此鄉心動今宵有
夢成

默深云首句入
畫次句畫不出

渡河遇相識寄家書

爾到長沙去平安寄兩行東風殘夜月逢我渡蘭

陽

默深云唐
絕遺法

朝城

蕞爾朝城地人煙晝不喧民窮兒女賤縣小吏胥
尊老樹藏官廨狂風落市門春田荒已久何事野
花繁

涿州

水落平橋淺山圍滿郭涼風沙盤涿鹿父老話樓
桑古意浮雲失車聲落日忙幸逢春過去草木有

輝光

一日

聖駕西巡回鑾前
駐蹕涿州

恭送涂淪莊師出守處州

惟良二千石帝念得人難遂以股肱郡分諸耳

目官忠傳焚草密政想坐棠寬匹馬攜琴去兒童
望豸冠

此邦風俗美官府若神仙吏侯山中屐人耕海上

田天心憂旱亟

時上方
禱雨

下國望恩偏應有隨

車雨清涼到執鞭

送徐南墅歸蘄水

一第艱難甚中年感慨生高歌無俗輩失意得狂
名獨客我方病先秋君已行蘭溪溪上水舊映兩
家清

送徐海門歸蘄水

黃花燕市酒萬里送孤征
失意逢迎拙依人去住
輕藁礎催客夢車馬帶秋聲
白髮門閭望風霜見
汝情

送李雙圃庶常歸省

已恨相逢晚君歸可奈何
大風生碣石斜日冷滹
沱對酒心先醉臨歧語不多
成名歸養志此意不

蹉跎

默深云三
四句唐音

送君南國去而我倍思親
若過湘中縣一看堂上

人天心方雨雪吾道自風塵預說歸家日看花尙
及春

枕上作

客子畏長夜鄉愁生五更亂蛩當戶急飢鼠上燈
輕夢短心常覺寒深氣轉清似聞殘月裏肅肅雁
孤鳴耦庚云六句
惟靜者知之

壬申

六月四日峴少尹招集同人於洞庭廟避暑
午間大雨詩以志喜

時苦旱

乾風吹人夜不睡晨興見日汗流背賢哉少公無
俗心載榼招邀江上寺寺門開對洞庭湖疏牖四
闢風來徐我欲借取洞庭水一半作雨蘇禾枯一
半化爲酒入壺解衣痛飲煩苛除雨來雨來萬人
躍雨猶未來聲先作砉然墮地雷電俱天影湖光
怒相搏遠樹冥冥盡化煙回頭不見臨江郭歎聲
雨聲雨莫分至是始信天心仁先時豈惜一滴水
非旱不顯神功神須臾雨止江澄碧天半溼雲紛
委積東湖老龍抱雲歸掉尾猶作跳珠白主人勸

客重舉杯兩岸相對青山開濯足江頭不歸去待
取片月淩波來董小槎云我欲四句奇氣奇趣蘭
雪云雨來二句接法佳默深云歡
聲四句頓挫出之遺山
妙境東湖二句警逸

錢璞齋見惠山水二幅作詩謝之

長日避暑如避逋煩襟苦與囂塵俱忽然坐我三
山隅涼風蕭蕭飄衣裾不知是山是畫但見墨痕
濃淡朝雲鋪遠峯一重一掩欲雨不雨青模糊平
岡一環一抱似煙非煙綠回紆上有千樹萬樹陰
陰夾路槐與榆下有十家五家鱗鱗比屋樵與漁

東湖水流入西湖遠聽有聲近卻無循山而南田
一區清遠頗與他山殊就中似有草覆廬彼何人
哉形容癯沐浴雲氣棲空虛手中不知讀何書紅
葉滿林霜欲枯耽幽守寂外若愚我欲從之問皇
初但恐俗障難驅除不然清泉白石我舊居有田
不歸胡爲乎默深云遠峰四韻清折乃爾令人讀
之如展畫幾忘其爲詩也遠聽句妙
手中句妙

余與王嵇崱先生相知最久而慳于一見聞
將有桂林之行賦詩二章託令姪雲樵致之

相知未識面相送不勝情老作諸侯客飢驅萬里
行江湖銷壯志草木變秋聲今夜湘中月孤舟何
處明

默深云五六
健句高格

世上貧爲累斯人氣獨豪隨身餘破硯

藏硯極多

失意

續離騷落日孤帆定秋風八桂高劉蕡猶有宅倘
過醑清醪

西城月夕

三十六灣秋孤城迴欲流寒濤沈戍鼓暗艣咎漁
謳雁落月邊樹星移江上樓青天相對久夜氣滿

滄洲

中秋洞庭泛月歌

有酒不飲空徘徊明月笑我非仙才眼前洞庭八
百頃水色況如新潑醅野航恰受三兩客槳舫以
外皆樽罍初更放棹不覺遠卻望斷郭橫雲隈舟
行忽到星斗上水底別有青天開須臾素魄出晃
漾冰蟾倒浸雪一堆君扁二山露沐首樓閣盡化
爲瓊瑰我時提取水底月盈盈貯向玻璃杯左徒
苦未知酒趣湘君夫人安在哉巴陵漁父頗解事

禁寒永夜相追陪憶我南游甫十歲波濤百涉心
如孩年來風塵益潦倒失意屢遭俗子咍惟有東
湖湖上月曾照我去照我來一年難得是今夜放
飲那顧寒更催醉臥不知風露冷清光還載滿船
回

默深云舟行二句奇逸巴陵二句漁父多情耶惟有二句明月多情耶

璞齋爲余作洞庭秋舫圖自題二首

一夜客無睡秋湖風不波船從漁父借月到洞庭
多鼓瑟湘妃怨鳴舷屈子歌樽前含萬古不飲奈
愁何

一白浩無際夜中天地清卻看孤魄滿分作兩湖
明帆遠欲無影酒香何處城醉時閒看畫猶認是
前生默深云一片清機獨來獨往

癸酉

家芝楣邀同熊兩溟顧劍峯黃穀原平舛年
明竹礪舍弟大雲宴集月湖酒樓

太白郎官迹已蕪喜逢吾輩置樽壺古今一樣看
明月江漢中分拓此湖忘世心甯爭雁鷺忌才勢
不到菰蘆不須更借黃筌筆水白山青儼畫圖

默深

云江漢句
對法妙

九日登黃鶴樓

自從十歲題詩後不上茲樓二十年
吟到雨風秋老矣坐來天地氣
蒼然大江帆影沈鴻雁下界人
聲混管絃寂寞繁華千感併浮雲
鬱鬱到樽前默深
云前四句徑路極佳後尤激昂入古

題常芝仙新秋臨池圖

渴飲漢上水飽看漢上山
盡將山水意瀉入筆墨
閒乃至不見水無非綠潺湲
乃至不見山無非碧

彎環落葉秋滿屋靜然一身閒我愧不學書積惰
心易頑江頭一黃鵠會與孤雲還

蘭雪云前八句
清脫默深云乃

至四句筆
端有舌

秦芝庭公子索題藏詩鵑圖

臙脂山上藏詩鵑一半種花半種樹半是詩人下
榻處入門見竹不見山落葉時露斜陽殷老屋卻
在山中間疏林缺處開朱牖一人低頭筆在手知
是哦詩劍峯叟復有一人行碧苔貪看遠山立徘徊
是我曳杖尋詩來黃公作圖翠欲滴公亦三年

陽中客胸有煙雲非筆墨世閒何處無青山草木
不靈花不仙勝地還要詩人傳左揖鳳皇右招鶴
秋月秋風勸華酌七百年來無此樂主人愛客輕
黃金客更愛才無古今後世有人知此心蘭雪云章法句
法神理音節無一不佳此等詩自然可與古人爭衡彼以劍拔弩張爲雄者皆客氣耳

過蒲圻贈家最峯大令

我從山縣過細聽野人言令尹新爲政荒年肯用
恩水寬魚自樂林靜鳥無喧治譜吾家舊如公氣

獨溫

蘭雪云四句簡要
默深云肯字深厚

到湘陰哭張一峯姊丈

到此心先痛湘雲慘不開是君魂斷處逢我歲寒
來往事如春夢殘燈忽夜臺言尋綦履迹四壁滿
塵埃

伏前與子別別後病纔生所恃年方富雖聞信不
驚三秋傳死耗一哭盡交情白馬來千里深慚范
巨卿

一家都愛酒兄弟各精神麴性偏仇汝酣歌竟不
春生猶杯在手死便鋪埋身斷飲從今始當筵淚

滿巾

蘭雪云句法俱老默深云沈痛

莽莽離騷國西風萬古愁可憐同作客偏汝不禁

秋

君以立秋日死

因憶去年病共登湖上樓沈吟山月落

尙約再來游

福善成虛語天心信可疑寡居吾有姊長恨汝無

兒雨雪孤魂怯江湖滿眼悲生前惆悵語好付夢

中期

蘭雪云五詩清空如話然無一字浮響其情真也默深云情至詩自真無心於杜而自杜

曉行

破曉纔分路輪蹄響復停大霜疑小雪殘月避高

星樹影連村暗雞聲帶水聽誰家林館靜幽夢未

曾醒

小槎云三四句長吉語
耦庚云此語未經人道

宿野寺

繫馬斜陽寺齋廚冷似冰寒僧燒落葉古佛守殘
燈塔短千山倚鐘敲萬壑磨夢魂知不遠祇繞白

雲層

默深云三四
句清絕冷絕

遊福德山寺

遠寺不知處寒雲深更深山空生妙響樹古有仙
心小坐僧移榻高談鳥避林攜歸一片石留伴雪

中吟

山有霧洞洞中有雪山山白石如雪
小槎云妙響仙心詩人自得之

黃鶴樓夜坐

散盡游人已二更高樓獨上一身輕浮雲不改古
今白靜夜方知天地清雁落孤洲寒自語江流片
月寂無聲道人一弄風中笛吹起蒼茫萬古情
苦雨忽霽步出城南望春

春事已過半農夫都在原雨多原不害晴速卽爲
恩水長欲無路花開何處村靜觀禽鳥意吾亦久
忘言

男
葉廷經
名禮編校

簡學齋詩存卷之二

靳水陳 沆秋舫

甲戌

黃穀原爲余補畫洞庭秋舫圖索詩爲謝

凡人胸中有物者定知落筆高天下君畫淋漓法
自然直寫灑落胸中天貴人百索不脫稿寒士欣
然爲傾倒昨朝浮我大洞庭天光四浸君山青高
歌古月不墮水紙外隱有蛟龍聽一官落拓武昌
縣終日江光供素絹吁嗟乎畫山不償公私逋畫

水不救田地枯君筆可訴真宰泣何不拜獻流民

圖

默深云貴人二句傳神語高歌二句警絕蘭雪云末四句詩人性情固應如是

孝感道中

半日山中路車聲聽不喧野雲多在樹春水不離

村詰屈鄉音換艱難戰壘存麥田含宿雨作意向

人翻

默深云三四句中唐佳境黃修存云艱難戰壘存五字真杜

汝寧夜雪

捲地風聲到枕邊夜深寒逼汝南天擁衾莫歎風

塵苦多少飢鴻雪裏眠

默深云儒者懷抱

河南道上樂府四章

賣兒女

河南一片荒荒土滿眼流離風又雨年荒父母竟
無恩賣盡田園賣兒女可憐父與母淚落心內苦
豈不戀所生留汝難活汝往年生兒如得田今年
生兒不值錢賣女可得青蚨千賣兒不足供一餐
大車小車牛馬走兒啼呼父女呼母役夫努目刀
在手百口吞聲面色朽此時父母死更生食盡還
增骨肉情月黑風寒新鬼哭飢魂一路喚兒聲

默深

卷之二
云末四句苦語令人不忍多讀
比天陰雨溼聲啾啾倍覺淒愴

狗食人

汝南人瘦萬狗肥前有餓者狗後隨忽然墮落溝
中泥狗來食人嚙人衣頃刻血肉無留遺殘魂化
作風與灰飽狗去搖尾嬉餘者尙充鴉鵲飢我
行見之心骨悲徒有惻愴無能爲大官北來何光
輝清道翼以雙繡旗從者飛語里卒知爲我亟去
道旁屍毋使不祥觸公威

默深云末二句慘絕

喫草根

怪底春光二月好踏青千里無青草草根當作麥
糧餐草色都如人面槁家家婦女驅出門手皸腳
軟聲暗吞樂歲歡歌茆苜子凶年苦勵苴蒿根畢
竟天心仁愛汝枯田尙有萌芽吐誰云小草是虛
生功在飢荒非小補夕陽歸去一肩挑飽食居然
腹不枵此時長吏方沈醉可惜不曾知此味

蘭雪
云末

二句冷
語刺骨

逃飢荒

救荒古有良有司今者逃荒官不知一路嗷嗷男

挈女紛紛避荒如避虎
餓腹况兼行路苦
清晨衝風夜戴雨
祇知四方口可餬
誰料飢荒無處無
官府捉人牛馬驅
慎莫乞食門前呼
家鄉臘前見三白
且可歸來食新麥

默深云官府二句可憫又云四詩香山樂府之遺

蘭陽守風

一

曉來天影變黃埃
天外驚風捲地來
隔岸似兼飛雨勢
橫流難倚濟川才
蛟龍影裏孤城動
鴻雁聲中萬鬼哀
身世蒼茫雙眼淚
沙頭忍凍立徘徊

庚耦

云四句可知用世之難默
深云五六句沈著蒼涼

濮州道中

父老車前說戰場可憐不是舊春光
桃花破屋開殘雪燕子空墳語夕陽
偶有人言驚鬼咎翻從寇盡見兵忙
流亡徧地須安集莫使田園盡意荒

蘭雪

云起結用意俱佳三四句哀豔默深云五六句悽惋沈痛

雨中吳蘭雪博士枉過寓齋縱談半日得詩
三首

一雨生夏寒空齋結遙想褰帷風在門
中有履聲響聞名心已移覲面氣先昶
縱談百世人物外得

奇賞相對如深山靜極生意廣須與雨亦止乾坤
助清朗

詩人滿天下古風日衰頽一墮溫飽中安能拔奇
才君身有仙骨懷抱冰雪胎示我秋懷詩其志良
可哀身世萬行淚寄託酒一杯冥冥天際鴻斥鷃
夫何猜

詩龕老學士妙筆今無比呼喻天下才氣若大海
水一官老無聊賫志忽已死遺詩高于山擔負將
在子此事如託孤安可避怨毀寸心營千秋何以

對知己

時方選梧門學士遺詩
深云此事二句未經人道語

喜得舍弟書

言多慰藉翻成愧
看到平安可當歸
一事傳來消息好
江鄉稻比去年肥

三十生日都門自述

上帝蟣蝨臣降生
人間世流光不知省
一瞬三十歲
夢月是何祥

母夫人夢月入懷而生沈

前生了不記入塾纔

五齡聰明過羣季
讀書通七觀
受詩解六義
同學二三子
驚我頭角異
衣食銷壯心
蹉跎失幼慧
墮

落文字中常懼天所棄

矜矜我先祖嶽嶽人中師恭承節母意思以善自
貽孝友風薄俗文章發天機八孫同受書愛我如
有私日受灌溉德長成木不知自從太邱亡常恐
先澤衰忽忽又十載悠悠竟如斯

乙卯我十齡夫子方筮仕隨宦到湘南浩游從此
始袖拂衡嶽煙心傾洞庭水再拜屈子祠三過鄴
侯里結交七澤中紉佩蘭與芷意氣託杯酒文章
洗雕綺愧彼湖湘人嘖嘖相歎美僉曰賢父母乃

生好兒子

出門求升斗負我晨與昏升斗迄無得徒傷游子

魂故人留我住同室如弟兄

李雙圃檢討割宅以居

炎炎正

午日空中萬車奔性僻不耐暑無事長閉門獨與

素心子一編共討論卻觀雙輪車上有新苔痕馬

閒日以肥仰秣如感恩

小槎云末四句意趣東坡遺山集中往往有之

少小不慎食病胃久成痼一臥動經旬遠游良可

懼昨夜風北來征鴻盡南渡我亦生羽翰從之奮

飛去瞥然墮家門歡喜動庭樹生憎鄰雞號蹶然

忽驚寤起挑壁上燈身若朝行霧夢中如有國我
欲移家住

十五試茂才三十猶潦倒衆人憐泣璞良友勗懷
寶苟得非所欣居貧詎爲矯榮華等拾芥當路胡
太巧忍持聖賢書易汝溫與飽浮念苟一牽方寸
不自保白雲紛滿懷此意豈枯槁

默深云末二句
深厚劉芙初云

六詩字字真樸無
一客氣必傳之作

二十六日不寐

領畧新秋味涼宵如此清風林千葉語水閣一螢

行病倚閒能卻詩緣悟易成靜參摩利佛誰識此

時情

齋中茉莉大開 默深云君詩實由妙悟得來自道出固佳

一片明河影盈盈挂樹偏秋心多在夜坐理妙于

眠暑退身初健鄉遙夢亦懸曙鳥栖不定將子亦

堪憐

耦庚云四句微妙顧南厓云合老莊之精成此妙語默深云此種妙理只許會心人領之

八月一日劉芙初太史招遊長河極樂寺飯

後至萬壽寺看松石渡河小憩昌運宮而歸

得詩四首

塵事百齷齪負此秋氣清故人招出郭遙見西山

迎水禽有奇羽風荻無定聲

隔林尋鐘聲一往肆幽敞屐行落葉深門敲秋雲

響不知何花開奇馨悅靜想

南唐云末二句蘇州妙諦默深云幽異

一松一精神一石一造化坐久佛無言微聞鶴歎

咤何不入山深人閒少真暇

默深云妙入不可思議

看松可當山看柳可當水劉子妙語言詩中有佛

理坐感江湖心蓴鱸秋正美

萬壽寺七松歌

不雨何爲怒濤吼綠雲橫鋪三十畝生平入寺不

拜佛茲乃絕倒支離叟二松在左二松右三松當
中相配偶旁一大榆羞老醜掉頭意欲牆外走靈
根日月照不到元氣自貫天地後我疑七松皆老
龍七龍上天成一松不然何故非枝葉一一變化
鱗鬣同傳聞寺建自璫宦幸未刻畫遭俗工譬如
高人寄廡下俊骨肯受凡夫容六時常覺聲沸耳
一塵不生何處風安得長欖白木柄剝取琥珀千
年紅不願食之壽無窮亦不願作十八公但願骨
節撐玲瓏春氣不死冰雪胸歌成似聞松太息白

鶴下來煙外立

默深云起四句傲兀走韻立韻奇氣又云舉觴白眼望青天皎如玉

樹臨風前可作君七古評蘭雪云靈根二句奇警七龍上天句仙佛語

中秋飲李雙圃寓齋放歌

安得樽中酒常滿不用沽
安得天上月圓景無夜
無酒猶可沽青銅錢月不能買
兩夜圓主人置酒
會佳節胡爲不飲兀兀眠
六街淨埽塵不起四捲
珠簾涼似水天公有意作中秋
風吹天開見天底
姮娥起舞虹霓裙雲璈仙樂如有聞
醉中天地忽已遠
吁嗟我是何時人
月兮月兮
醉汝一杯酒清

輝與之共長久前年中秋洞庭湖寫汝魂魄入畫
圖去年中秋武昌郭從汝西樓借黃鶴今年乞食
到京華今夜相看倍憶家巴陵一樣團圓月照見
堂前雙白髮酒後如聞太息聲天涯游子歸何日
此身恨不化爲明月光半照他鄉半故鄉元霜爲
酒霞作漿東方不旦樂未央月華安能不圓缺人
生安能無離別夜深獨立真宰垂滿地空煙莫成
雪

小槎云巴陵數句神來之筆蘭雪云至情至性
語以奇逸之氣出之仍是才人本色默深云秋
舫真性情於此詩見之底韻深穩一結真杜又云
向閱此詩亦覺其動人處迥異尋常今得小槎先

生評乃知真情語
固人有同心也

雲汀侍御移居詩以賀之

前街後街鵲噪晴前車後車青驄鳴奴子背負鼎
臼鐺架書匣硯鏗有聲誰與移家盡室行馬上笑
者陶先生新居沈沈賀客滿或牽其羊媵以瓊我
貧在客無一錢請爲先生說家典昔者栗里翁移
居南村中閉門種菊春在胸又聞華陽子移居東
澗裏山中宰相臥不起二公槃槃濟世才豈真甘
老蓬與萊雲行雲止無蹤迹今日山南明日北先

生二公之子孫遭時著作金馬門眼中已見三易
宅官窮屢受催租逼吁嗟乎江淮千里田地枯鴻
雁流離無定居正望御史一言惠鰥寡勝造千閒

萬閒厦

默深云起六句一幅移家
圖一結通體爲之加厚

將出都始識魏默深長歌別之

十年客南國不聞魏君名一朝長安道傾蓋如平
生昨日相逢今日別執手蒼茫不能說我初見君
黃花秋是何年少意氣道長揖衆中與我語乾坤
朗朗吞復吐當時聽之閒然疑君去累我三日思

尤工古風近罕偶立心恥落風騷後昨夜大風吹
赤埃海水倒沒黃金臺無衣生受霜霰猜饑餓作
客胡爲哉我有一輪清涼月出入洞庭蕩精魄別
來湘女怨瑤瑟歸去江妃送蘭楫左徒勸我酒一
杯九歌纏綿亦未歇此時我醉愁真宰此際可憐
君不在白日躊躇不肯行青山俯仰如相待待君
不來登祝融遊戲洞雲翼天風作書付與北鄉鴻
一月可達蓬萊宮遇合分離偶然耳人生哀樂不
在此我持問君君不言歸叩吾家雲心子

郴州陳
起詩雲

心亦異才也默深以書付余屬歸訪之故云
雪云前路史記敘法昨夜二句接得道壯我有二
句接得飄逸別來四句從別後進一步寫妙極深
極此時二句神情俱到白日四句純是騷理長吉
所不能到一結無限煙波默
深云才大如海情深亦如海

貞女葉三姑行

漢陽人葉雲素師之女

吾師葉夫子家世流芬芳肅肅詩禮門兒女習義
方膝前有貞女節義明于霜名在列女傳我能道
其詳女名曰三姑誕生乙巳臘三歲學穿針五歲
學賦蠟夫子登進士簪毫鳳凰池貞女方七齡從
母來京師堂堂許司寇是時始爲郎脩身直如矢

聽獄平如衡一見葉夫子相好若弟兄司寇第二
郎小名十四官羽毛雖未成意在青雲端掌中有
明月兩美合必難訪得葉氏女始請爲昏因誰爲
鳳凰媒楊羅兩太史是日月日良俱會葉氏邸許
公亦在坐酒行三巡始三姑出中堂衆賓爲之起
一一拜衆賓左右生光彩以次拜許公三拜無違
禮衆賓齊讚歎許公大歡喜許公謂葉公爾我年
若此何日了婚嫁兒女事畢矣天道有枯苑反覆
安可期王子秋七月天奪許家兒凶問至葉氏葉

母意慘悽背人獨揮涕未令三姑知三姑察母意
母意何悲切久之竊有聞搶地肝腸裂長跪父母
前兒志今已決便可歸許家甘與死同穴是時裁
十齡出語何皎潔阿母苦死留閉門脩芳節春亦
非我春秋亦非我秋嘉慶辛未歲一病遂不瘳病
中語喃喃歸骨許氏邱三月十七日氣絕凝兩眸
是時許司寇督漕江淮閒其夜許母臥四更鼓聲
寒望見三姑來形瘦影復單哽咽不成語執手淚
汎瀾一痛遂驚寤猶見立燈前曉語許公夢知是

死者魂家有一乳媪說姑淚不止伴姑二十年未
見笑啟齒中庭及後圃未見三姑履晨夕問安外
書史無暫離自知年不永預製斂時衣荒荒史家
莊中有許郎墓死者不可奪遂以貞女祔墓門何
所有青青女貞樹一碑三尺高千年鬼神護或云
十齡女守節古未聞茲乃天性然禮教夙所敦不
見葉夫子五十猶慕親哭母如嬰兒斷絕酒與葷
慈烏子反哺孝竹無凡孫美哉文夫女乃生孝子
門默深云敘事純用史法其夜數句慘絕補敘
從乳媪口中說出故妙耦庚云結有古法

出都詩六首

昨日盛冠帶謁帝未央宮曉日生殿角照見天
地容慶煙上下交暖然一氣中天子敬愛士布

之滿辟雍鯁生實未學得毋慚鼓鐘歸從魯夫子

讀書東山東

時余以舉人考
取國子監學正

與君久相處豁達成一心以月置水中不知誰淺
深北風來無方流光忽不在月自西上天水自東

入海海枯天無情舉頭見月明去去君莫顧浩然

吾已行

默深云著此一首前後益覺
靈迴脩存云起四句有古意

客程晝夜急恐落賓鴻後萬星拱北辰我馬獨南
首五更兀中野忽忽夢吾友似憐客子單殷勤意
良厚衾寒易驚覺彷彿語何有萬里父母身風霜
慎擔負

默深云結語真厚耦庚云
事親守身不當如是耶

我行曹濮間十里炊煙絕扶杖者何翁乞錢走蹙
蹙惻然問所由欲答氣先咽家本西南村力田食
不缺昨歲遭兵荒攜家去倉卒亂離一身多忍與
兒女訣歸來苦無屋朝暮臥積雪天何愛孤寡留
此凍餓骨言罷雙涕零悲風馬頭發

蘭雪云有老
杜三吏三別

遺意

昨來兩河荒今歸兩河熟荒是兒女命熟是長吏
福暫時脫飢寒遑言來歲蓄旁觀哀目前愚者圖
果腹豐歉不在天至仁有常足誰極惻怛心永全

流離族

小槎云三四句悲絕警絕

朝見太行青暮見太行碧行人無時休山意去不
息立馬望中原縱橫見城邑去雁無定聲垂雲可
憐色戰餘草木荒歲晚風沙直萬事信冥冥我行
徒惻惻不有霜雪威詎知陽春德

默深云秋舫五古至此詩而大

進矣又云骨重神寒眞實力量
固自不同包慎伯云蒼涼古直

蘭陽渡

驅車復驅車來問蘭陽渡
往者渡蘭陽涉波若平
路今來渡蘭陽三日河上住
沙隄立徬徨徬徨白
日暮大船呼不來人飢馬亦怒
河上一丈人舉手
揖馬前勸客且勿怒
少待會有船不聞去年秋河
北新用兵難民如窮鳥
各各逃其生不辨兵與賊
但聞殺人聲倉皇至河邊
紛紛繞河行朝呼蘭陽
渡暮呼蘭陽渡但見河流高
不見船來處難民相

謂曰各有父母子甯前赴河奔母後從賊死是時
蘭陽令騎馬巡縣城馬行忽躑躅天地皆哭聲哭
者呼渡船渡船泊縱橫縣令惻然動下符催渡船
小船載五百大船載一千頃刻順風起河伯安其
瀾紛紛登于岸哭拜縣令前中丞在軍中聞之大
震怒倉卒千餘人安保無錯誤不奉將軍符縣令
敢輕渡荷校徇軍中國法情不恕從此蘭陽河有
船不得過九月至十月死亡亦已多軍中令如山
縣官可奈何逆賊自殄滅天兵不逡巡三月遂大

捷五等酬功勲 天子謂縣令枉法而救人使復
宰故邑撫此瘡痍民行旅聞令賢徒步來蘭陽商
賈聞令賢擔負來蘭陽船少渡者多願客行勿忙
丈人言未已大船來如駛上船謝丈人布帆西南
指耦庚云不辨二句慘極難民相謂四句痛極行
旅四句樂極蘭雪云余秋懷詩有云民窮不為
盜橫死殊可哀與難民相謂四句意同
默深云音節神理俱從古樂府得來

苦寒行

我之行矣指孟冬二十日朝天大風陽戶倒吹入
地底寒門崔嵬翕當中前雲後雲天地同滕六胡

我難相容雪前風吹面如裂雪後風來骨欲折忽
然鱗甲生滿身未必肝腸果成鐵我馬旋立不受
鞭我僕俛行高兩肩有酒不辭買一醉行過十里
村無煙太行西來僵不動滹沱東流連底凍大樹
飄零白雁魂明珠破碎驪龍夢寒威未許尺寸逃
世間廣廈嗟何用烏虜天帝本至仁衆陰獷牙盤
九閭餓蛇毒虺左右蹲噓氣作虐誰敢噀亦知閉
塞成冬令此物宜微不宜盛元冥敢奪東皇柄亟
召陽春蘇衆命陽春不來呼羲和羲和上天行蹉

跼蹐烏陷雲出不得夸父負杖可奈何可奈何且
前征敢愛一身遺蒼生極天瘠土荒莫耕得雪可
望春麥青寄言良吏哀飢嬰河北去年方用兵小
云似韓太行四句又似長吉修存云是香山學杜
詩默深云格調適老在七言中最爲沈重有骨力
蘭雪云結
法最健

憶李毅

李山西澤
州詩人

李生不羈才飢走萬里外一身大布衣昂首天地
隘千金去弗顧送酒乃下拜悲歌浩無方舉世稱
曰怪長安風雪中誰與償酒債蘭雪云千金二句
傳神又云甲戌李

生與魏子默深同在京師李爲家王松太守所賞
而子愛默深尤擊魏好學而狷李嗜酒而狂竟以
酒死可哀也已

冰山吟

襄陽城中五日雪襄陽江水化爲鐵千船萬船凍
欲折夜半猶龍驚夢熱以頭觸水水迸裂大冰峩
峩壓江來可憐鐵船立成灰人命爲魚魚爲齏是
夜月黑青天哀冰山力大荆山摧吁嗟乎冰山橫
來果何苦會看白日消融汝

潛江舟中

落日潛江縣空帆信所之水深人語應鄉近客心
疑遠雁依天盡寒魚出浪遲晚來風更好無奈泊
船時

龔定菴云末二句有
史事默深云可味

漢江歸舟夜行

近鄉情轉急歸思與帆懸水落孤城大天垂兩岸
圓遙知堂上夢早到漢陽船羨汝南飛鵲聲聲在
客先

簡學齋詩存卷之三

蕲水陳 沆秋舫

乙亥

燕支山消夏作

何以消長夏林亭半嶺間
高雲疑在樹急雨欲無
山石畔驚泉落琴邊看鳥還
紅塵紛逐暑未識此
中間

山中月夜

良夜不成寐坐看山月生
樹如將曉色蟲有欲秋

聲溪水照逾靜竹風吹更清夢魂知不遠祇繞白

雲行

默深云三四句幽異

中元黃鶴樓待月

醉後婆娑不用扶登臨恰與好風俱暮天悄悄月
將出江影荒荒山乍無靜坐偶教千感息高懷獨
倚一樓孤誰家漁艇歸來晚驚起斷鴻雲際呼

耦庚

云三四句空際傳神默
深云寫景入微結逸

秋齋讀書雜感

本性耽寂寞因與人世疏出門樂山水閉戶親詩

書高齋誰所營貽我以有餘客居雖云暫誰謂非

吾廬秋節忽然至浩歎盈空虛涼風感牀席蕭蕭

來告余

默深云中四句陶語
耦庚云無入不自得

終日坐修竹愛其蒼蒼然流風動左右爲我留青

煙雜花非不好色無三時妍草木各有命榮枯豈

由天靜觀落葉理因悟無生前閒居積恐懼何以

終華年

小槎云學者之
心如是如是

秋蟲不知寒唧唧何唧唧千感并一聲浩然盈吾

室嘖嘖始生鳥一枝爲之巢朝出謀啄飲暮歸語

嗷嘈日與鳥雀處羽翼安得高感茲坐太息羣生

各亦勞

耦庚云故學者貴及時取友以成其德

院深人迹稀羣卉樂其養歲久成荒蕪行步遭宿莽主人惡非類翻然荷鋤往吾前止其行誅惡忌搶攘羣物各雜生不礙蘭蕙長秋雨綠一山始見門戶廣

耦庚云於此見秋筋心地之廣然愛衆親仁亦自有別也

委骨在牆隙衆蟻何營營蟻多骨苦少彊弱殊未平得之不必飽失之乃成爭利端卽禍首何以安羣生聖人體萬物無過口腹情

默深云老重耦庚云利端二句倚伏

之機可畏哉末二句周官一書爛熟天理無非曲體人情

虎豹而卽人利在求其肉蜂蠆亦何爲豈曾沾汝
腹物生各有情百防時反覆高堂生蠨湍厚味中
腊毒哲士知其然慎身如璞玉不貴外無患所期
中自足

大山襲氣母土石但堅厚無端雲祁祁俄頃起枯
朽靈澤無殊施物情有異受龍乘此變化舒斂若
無有陰陽蘊洩奇乃知造物久吾欲論其精徒然
見塵垢

耦庚云同施異受天豈有厚薄哉人當自反矣

高齋淨無埃萬卷森在列多讀吾未能靜對良亦
悅六經有微言了了川上月印波本常圓投石乃
成缺末學多支離精義日微滅小子生又晚何由
晤前哲修存云多讀二句真讀書人語小槎云印
波二句與燭籠添一條骨子障一路明同
意蘭雪云秋舫詩天才亮拔是其本
色此後諸作氣斂而理深進乎道矣

中秋後一日偕劍峯爲黃州之行

朝談武昌山暮發江夏船挂席秋已半弄波月尙
圓佳游無多侶與子同一閒要以文字契了此山

水鏡

默深云朝談暮
發暢哉閒也

靈泉寺

萬樹結一綠蒼然成此山行入山際寺樹外疑無
天我心忽盪漾照見三靈泉泉性定且清物形視
所遷流行與坎止外內符自然一杯且消渴吾意
不在禪小槎云起四句幽絕默深云陰森如見耦
庚云泉性二句惟靜者能宰天下之動蘭
雪云妙有名理又云字字澄鍊五古中
最高之作慎伯云偉抱獨觸慨當以據

寒谿寺

靈泉秋在朝寒谿秋在暮寺門開夕陽落葉閉斜
路卻聽流水聲寒色上衣屨霸圖歇千載亭館化

邱墓

寺外多荒塚

獨憐僧與佛終日坐深樹空山一鐘

響曳杖吾亦去

默深云寺門四句清幽如見一結悠然

雪堂拜東坡笠屐像

如此江山不負公千年笠屐認元豐徘徊不見鶴

孤下暮色蒼然來向東

默深云高調

雪中家伯愚谷先生枉過燕支山賦呈二首

積雪滿林屋沒我階上苔三日閉門坐悄然對寒

梅誰知先生杖爲我山中來

默深云常調

七十猶好學無人知此心虛懷發高論獨許吾知

晉夫子下山去梅花香滿林

小槎云味外味蘭雪云吾無隱乎爾

項師竹張馥亭自麻城來訪欣然有作

快雪天易晴蕭然獨成醉梅閒一雀噪雙雙故人
至知我相念深感君遠來意前夜江上風舟來亦
不易相逢且爲歡誰問別後事空山不知寒星月
同寤寐

美初云三四句與柴門鳥雀噪歸客千里至各自入妙耦庚云前夜二句極淺語卻

有真味定菴云誦之益然而和其和在神蘭雪云其節安以和默深云子美夢太白詩意蘇州寄山中道士

詩格

丙子

送唐竟海歸省

終歲與君處尋常無殊異坐我明鏡中自然呈浮
僞能使妄者心照之發深愧今當臨別時耿耿如
不寐謂君不戀官彼自爲官累恂恂子弟身灑落
胸中事聚散何足云萬里感精氣去後思更深常
懼爲君棄

耦庚云我亦常存此懼默
深云知己之言至情之語

送魏默深歸湖南

出門求師友入門戀庭闈古人學如此君乃今庶
幾三年長安住艱苦厚自持在紛氣不亂獨行貌

如疑甚愧君意厚續紛摘吾疵願同歲寒節奈何
舍我歸門閭此時望雨雪安可違羨君南行樂自
感游子衣此去過長沙我父官于斯登堂見我母
具道兒今肥古來賢豪士常願生同時同生不同
氣偶合終成離送君旋閉戶積此悠悠思耦庚云在紛二
句畫出默深可以觀所養矣同生四句愛敬到極
處矣施之默深可謂善用其情修存云登堂二句
秋舫妙境他人所不能到蘭雪云讀與
唐魏贈答諸篇至性虛衷可愛可敬

冬夜

沈思與浮慮異趣同營營不有夜氣息何由知至

精影與一燈靜心隨羣籟冥出門視天宇闐若戶
方扁上下同一寂寞宰獨未停還歸滅燭坐虛房
羅衆星

默深云起四句高境收六句精詣
耦庚云雲雷經綸正在此時著力

寄答竟海四首

熒熒參當中懍懍歲已莫風吹樹上茅雪墮門前
樹故人一紙書遙自江南路其言清且溫一室爲
回煦想當臨發時真性感毫素挑燈如共語夜久
有餘悟

人海足車馬夜久聲如織靜中感至聽今古去不

息豈無下帷人端居秉先則夢干酒肉恩神厭簞

瓢食濁心而清貌仁義中梗塞閒望西山雲御風

獨高出安能化玉水一洗塵中色

默深云清明在躬志氣如神讀

之使我拔泥汙而升霄漢蘭雪云此詩刻入清適較冬夜一首所造尤深

昨日雲中叟招我海上山感激從之去不知險且

艱道逢舊相好攬衣遮我還此中多豺虎何苦自

棄捐豈不思返轍後有千仞淵失足分寸地孱軀

墮荒煙卻視雲中路五色導我前初程不努力何

由造其巔

默深云頑夫廉懦夫有立志又云如此等作若但從詩中尋求者能有此耶俯

視俗學俗詩無一
得以染其筆端矣

古今有相感曠代爲疇偶亦有同堂人一膜膈誰
某執業須執真結交須結久所懼德不修內外成
兩負知再見君時還相許與否至哉書中言入道
去其苟雖乏卓犖姿敢不再拜受

修存云四
詩真至

楊忠愍琴

背有空谷流泉四字十一月十
七日與同人觀於方彥聞齋中

大絃小絃正君臣一彈再鼓忠奸分黜然而願中
有人枯桐中含天地理三百年來心不死椒山之

膽亦如此

蘭雪云簡勁
默深云警拔

立春

我之來矣逢春去今我未歸春又來積雪忽添門
外水好風先上屋邊梅客當歲暮心俱促天到寒
深意已回言念親庭四千里望雲獨自上高臺

默深

云語無湊泊六句學問語耦庚云天心萬古如是所以生生不已慎伯云吳體到此頗難

丁丑

十一月默深留長沙相聚旬餘得詩五首

久客今還家狎戴父母寵積茲手足閒漸覺聰明
遽忽與良友親一敬疏百冗歲寒天心積客途交

誼重曉夢得雪清生意看梅勇載誦風雨篇雞鳴

發深恐

耦庚云積茲二句發人深省

秋前恐子行約我歸方去我歸及孟冬君已戒徒
御愛子那忍留念子庭闈慕會當臨發時縷縷兼
旬聚流連燈燭光風雨對牀寤飢寒非所知把酒
論歲暮

歲暮百物斂縱心俱一收檢點終歲事一身千悔
尤幸有同心子切磋補前修安得常相聚息黥造
天游長安董夫子

小夙昔同咨諏師友發神悟志槎

願非小酬晤言不知樂離索始綢繆別時病在肺

別後今瘥不端居一相念雨雪江湖悠

蘭雪云起四句沈摯

語是從修省中得來故無腐氣耦庚云若檢點終身事更當何如此子與氏所以戰戰兢兢也慎伯云作者於結語極經意颺出題外以取遠神如此三首換意換筆各極其妙

江湖授經史生徒秀且慙問君何以然去浮還其樸我有子姪甥閒居習耽樂賦性都不頑安忍廢雕斲人生溫飽中諒爲天所薄苟非嚴根株何以拔溷濁朝誦雪覆窗夜課燈搖幕相督亦云切暫憤終不樂已矣夫何求壯也吾未學

熱士趣勢要冷士趣林幽所趣異楚越各抱無涯
憂登壘商猶賤乞墦士不差軒冕信可榮其如與
心仇管華久同席旦夕俄分輶一念靜躁間終古
霄壤侔君看山中雲崇朝幾沈浮真山久不動茲
焉庶堪儔默深云敢不敬佩斯篇定菴云起四語
卽莊生滅穀亡羊之旨又云雲自浮沈
山自不動所謂千軍萬馬中本無一事如果實證
實悟到此地位則勢要可也林幽亦可也無涯之
憂總是憂道非爲冷熱
憂矣此詩大旨如是

送默深歸邵陽

歸家何事樂忘飢爲有良朋講習資名到無成方

肯悔學當欲進轉多疑江湖歲暮愁行役風雨城南繞夢思誰使索居增悵歎聚無三月又將離庚

云三四句心得語默深云

善學者方能有悔有疑

俗學支離誤此生浮華既重本根輕我今暫釋庭闈望君更無虧菽水情戀母心隨湘九轉還家客似雁孤征平生願學惟曾子養志當年未鼎烹時

深方法

曾子

戊寅

劉貞女行

黃岡縣南長圻塲江水出其前其後有湖其中爲平原其民樸而野十室九種田有劉氏女倪氏婦塊然貞節聞其閒女父劉文暄女壻倪文錦兩家居不遠媒媼一言允待年各脩飾但未成合卺壻生十六年一病危如絲女請于父往視疾病者相向不語但涕垂女來七日而壻死女之來也未結縵女念死者有父母死者已死生者誰扶持無子有子是在婦服婦之服斬其衰舅曰有姪汝嗣之煢然弱女兼有婦順與母慈壻之死也一殤耳女

乃使之上有父母下有妻子有祭祠三年服除女
母念女素車還家淚如雨有姨老矣絮語刺刺意
吞吐女聞語塞兩耳姨奈何言若此哭拜父母前
決絕姑與姊兒今去不來矣直至五十餘劉公劉
姥各八十女乃再駕歸寧車歸家省其慈女死之
時乾隆五十有四年苦節無人知縣官不聞名其
姪章福爲我流涕而言之更有爲言章福亦純孝
居今之世貌古貌朝出力田夜歸奉親父死廬父
墓母死廬母墳六年之間一昏晨窮冬僵臥夜雪

紛紛母憐兒寒覆以魂夢中抱母不見母往往夜
哭驚起村中人烏虜忠孝天地理詩書有力扶不
起茲乃得之農家子何況雙孝一門裏讀書數十
年一節無可稱能不愧欲死作詩者誰蘄陳子告
采風者書青史蘭雪云敘事有法造句有力音節亦頓挫入妙窮冬數句警絕痛絕
默深云昌黎樂府高作女乃使之句一筆千鈞耦庚云上有父母下有妻子婦節所以與臣節同功
題陶雲汀侍御巡漕禱冰圖

去年舟泊長河水蘆花戰戰波不起舟人指點貞
應祠異事猶傳陶御史御史視漕瓜儀時空艘獨

歸不敢遲湖神公然劇作虐一夜凍合青玻璃船
船僵立形如槁愁絕長年與三老御史曰嘻奈何
冰奈何冰貞娥有靈吾其禱繡衣再拜伏致詞左
右不聞神知之其夜神鴉飛五更耳畔流春漸朝
來大綱急帆鼓暖風吹送千枝艣十日連檣盡出
江回看依舊冰如堵舟人不識神功神滿口但稱
御史仁御史平生仗忠信歸朝入奏推神應作圖
敢說小臣功嘉貺良由天子聖天子用人特斷決
御史又建川東節川東自來盜所逋武侯文翁澤

有無勿疑薄俗難滌除誠可格神况區區還視長
河禱冰圖

與蘭階兄

與君幼相愛師友弟兄閒不信十年別居然雙鬢
斑風塵銷歲月門戶飽憂患夜靜重傾酒寒星照
一山

先世有餘善清芬流一鄉人猶過門式我敢抱經
忘月轉空庭夜風喧老木霜起看邱壟近佳氣鬱
蒼蒼

亦知兒女大無計御家貧衰盛將由汝飢寒豈負
人世情窮易薄吾道困能伸歲暮厭霜雪甯知中
有春

壽徐嶺松先生八十

八十老翁今逸民日讀周易不知貧乍看松菊皆
可敬得侍杖藜如在春曾中正多行樂法門下大
有窮經人白石清泉好顏色天將留使風俗淳

登琵琶亭望匡廬出雲

江上孤亭倚碧空匡廬飛墮玉芙蓉才看一點雲

生處失卻東南無數峰

大觀亭遲汪均之兄弟

日落皖口西船泊皖口東獨見一亭古蒼然元氣
中俯聆浩浩江仰睇謾謾松二聲併入夜相聚生
悲風之子期不來使我久支筇

默深云
高古

入小龍山拜稼門師墓與均之

江上望龍山峭如霜中鍰盤旋入山腹敦然去劉
削中有千歲雲其大兼衆嶽作霖亦云勞忽復還
寂寞我欲從之游何年閉幽壑佇立雪已深衆山

化爲鶴

定菴云吾聞之江鐵君亦云然知先生良史非濫辭也

我昨聞汝病如適在我身踴躍來視汝忽如冰得
春尊酒過夜半語多屢沾巾乍逢良慰藉言別轉
酸辛門庭限南北慘淡霜雪晨古人惡如此所以
早結鄰

默深云酷似晉人慎伯云質直有勢能狀難達之情

江夜

簞策橫吹夜寒風盡意號水將孤枕急霜逼衆星
高漁唱從爲樂雁飛無乃勞荏苒羣盜滿吾敢信

波濤

時江上多盜警

放船

灘頭十日坐風信一朝移順逆天何意窮通我自
疑雲開羣雁喜帆直衆山隨莫倚江如鏡中流柁
要持

耦庚云三
四句含蓄

月夜過采石江弔太白

公竟不相待大江吾獨東卻看山月色相送水聲

中

修存云太
白不死

楊州城樓

濤聲寒泊一城孤萬瓦霜中聽雁呼曾是綠楊千

樹好只今明月一分無窮商日夜荒歌舞樂歲東
南困轉輸道誼旣輕功利重臨風還憶董江都定
云裂筵之作蘭雪云五六句紀實語非
憂時者不能道出默深云末二句真杜

邳州道中守雪示弟大雲

作寒久不成雪總而至稍失簷際山漸沒階下
地虛空捫有稜晝夜混無界側身酒家壚四壁風
破碎勢欲挾茅龍上天始稱快一僮倚爐眠獨與
子由對同行吾良樂俱出親何慰靜感行路難徒
勞倚閭喟寒雞喔喔號對牀不成寐

默深云少鶴
神來耦庚云

晝夜句語妙同行二句深婉修存云真切語不多
得又云合韓柳爲一手蘭雪云語質而味深此與
小除日作皆得東野
妙處似不甚近柳州

小除日景州道中感賦

最好故鄉居難得少年日田家重歲終樂事從頭
述兒童放學歸姊妹牽衣出三五各分朋百戲不
遺一我時尤狹黠羣細聽驅率偶遇大雪晨搏作
維摩詰譁然謂弗似又累山屹峯或編草爲龍盤
旋中音律旣夕始歸來嬉笑滿房室晚飯不肯飽
一閨爭棗栗長者將予杖急則抱母膝自倚誦書

多不受相撻扶有時過鄰姆殷勤代梳櫛果餌非
一名充然懷袖溢家家有餘糧兒女互慈恤風景
廿年前記憶難具悉少小雖癡頑回首如夢失時
余方在途星霜夜慘慄耦庚云起二句此景最可
念默深云晚飯數句左太

沖嬌
女詩

除日抵京

四千餘里舟車馬九十日程雨雪霜

十月朔由
武昌解舟

短

景行常兼晝夜長安到亦抵家鄉轉無往歲追逋
苦奈此流年過客忙兒女今宵知憶我祇應歡笑

慰高堂

默深云格律俱高

男
葉廷經
名禮編校

簡學齋詩存卷之四

蘄水陳 沆秋舫

己卯

秋霖三首

秋氣已不憚秋霖况浪浪漆雲閉閭闔放此陰蜺
狂羲叔不在御天心毋乃荒颯風吹幃闔晨夕度
混茫巷無長者迹蛙黽登我堂感此百蟲語曠然
懷舊鄉夜中八九起顛倒余衣裳倦極一欹枕夢
見白日光

雷電驚夢回雨聲在牀足敝衾半濡溼無睡坐舉
燭案頭見邸報水決渾河曲密雲及灤平十室九
蕩覆魚腹之所遺漂搖水上宿民窮恃天慈胡亦
降淫毒夏不澤我田秋乃毀我屋浩蕩聖人恩
賜帑助修築百里無乾土何以興畚揭愧我竊安
居屋漏猶爲福

淫潦終不止行役終不已駕言出蒼游車覆溝中
水登城望郊畿平地成湖海奔雲驚鷁愁大澤鴻
雁餒君王塵秋巡不以雨廢禮恭聞萬乘出清

道百神使太陽啟朱輪屏翳敢亂紀寄語流離民
見天終有喜

移居詩賀程雲芬前輩

積雨乍霽纖埃無翰林主人移新居奉太夫人登
板輿梁家少婦左右扶奴子三五背負鼎白琴尊
壺架書匣硯副以雙驢車新居最近城南隅祝園
封園今則蕪國初前輩風流殊亭館頗分俸所餘
虎坊別墅崑山徐藤花書屋秀水朱老樹村邊給
事廬晚翠閣裏多奇書太平官府百不拘暇以文

酒爲歡娛枚馬詞賦盛西都褚虞身在瀛洲圖數

十年來老輩徂屋少于前官倍初賤子一歲三易

租草草賃得黃公壚

余寓卽黃氏萬卷樓

君亦夜夜防穿窬

自春卜遷秋忽諸吁嗟作官不謀屋一區何況窮

士遠來困泥塗何況百姓磬磬不得完田間君才

豈屑一室自埽除種花蒔竹手把鴉觜鋤壽母見

之一軒渠以此自樂良非迂秋來佳日不可辜何

時花裏開冰廚槐籜看菊邀吾徒

槐籜查初白舊居集中有同人

過槐籜看菊留小飲詩君新寓廳事有古槐一株

故云

默深云筆力老橫蘭雪云兩用何況字頓

挫有力耦庚云滿
腔子都是生意

臨海王淑姑行

此身一許人安可復改移不見王氏淑姑父命字

李文煒臨當嫁不諧死之

一解

李家去姑家二千里

修且阻其父聘姑家不知別聘吉氏女相持兩不

下議兩取姑爲姊父許女亦許

二解

母愛女吾女奈

何爲人姊爲我名媒來吾當自擇壻何必李怒還

其聘絕其使母誠愛女女不喜

三解

五月二十六門

有戲侏儒一家俱出觀回頭不見淑姑趨至母所

姊妹所卒不見姑兩金環貫指灼灼浮出舍後井
中嘻淑姑金環李家聘中物久不見奈何藏之姑

藏之殉其軀

四解

同邑洪節婦獨居一閣曰素輝不

下閣三十年姑幼從讀書大義有所傳至是聞姑

死素車往弔淚血斑斕檢篋得詩上言不怨妾薄

命其下言我生至性賦在天

五解

李氏子有禮如壻

迎以來載其木主去展祭中心摧其後吉女獨于

歸歲時拜木主前呼曰姊吉女亦賢哉

六解

存云一起修

老絕兩金環三字躍

出耦庚云結有餘味

送黃修存南歸

我不識君陸君

彥若

言之陸君之言樸然無欺西風

古寺落葉褰帷魏子亦至俱慰相思無有新舊決
去嫌疑

我有敝琴絃古音希必逢佳客亦爲一揮感君至
意於我依依和易正直善攻吾非夜久語深急雪

打扉

耦庚云和易正直善
攻吾非安得此良友

先聖道衰士競文字雖此區區亦判真僞苟焉諛
時卒乃弊世誰爲倡始習于閹媚何以挽之正心

純氣

尊酒不仁日餞離別陸君東馬

彥若之奉天學使幕

魏子西

轍

默深之山西方伯幕

浮雲上天奄忽相失謂君其留歲寒

同恤奈何告余旦當南發

霜夜天高仰視箕斗南北相望精神永久子歸有

喜入門嘉偶居室輝光令妻壽母雜佩之好以問

朋友

修存歸娶告以善者他日名德事功皆從此出豈獨文

蘭雪云秋舫取友如此誰不樂哉

哉

庚辰

送胡墨莊前輩之延建邵道任同詩社諸人
作

早聞六義說紛綸不取浮華取性真

先生精于詩義

作鎮

東南用儒者從今雅頌在斯民車停細雨觀茶戶
手拔寒星出劍津只惜詞壇重載酒座中獨少解
頤人

南歸

雲邊湘水縣夢裏武昌城久累雙親望能辭六月
行全家依薄祿幾載徇微名有弟能供養難堪送

我情

乍別西清地初登逐熱場雨多偏在夜風午不成
涼馬渴爭溪飲奴飢索果嘗卻觀耘耨苦不覺暑
全忘

七載中州地三停過客車那堪洪水虐纔是大兵
餘螻蟻爲隄命龍蛇尙邑居帝心殊未釋天意
欲何如

道旁何處縣官柳萬行陰安得賢司牧都如此用
心晚涼烏雀靜新水黍苗深車馬風塵際能開過

客襟

本意乘車便翻成買棹行衆流趨漢水游子赴鄉
情月照一帆久秋隨雙槳生江城好山色隔縣已
相迎

十月二十五日暮過黃州汪竹千同年攜其
子送至赤壁而別

我行良怱怱念子暫來過子意何惻惻送我城之
阿白日下西山蒼煙橫大河燈火見赤壁卓然立
危波此地一攜手斯須已爲多卻憐阿戎小依依

奈若何

默深云
高古

辛巳

新橋驛夜霽見月

我行屬暑雨我馬日駢駢
俛愁滑滑泥仰歎炎炎威
孤驛息深夜瞥然見涼暉
溼雲去未盡列宿光已微
孤行青冥裏冰輪竟何依
獨有巢林鳥戀景戢還飛

慎伯云古之傷心人別有
懷抱令我讀之心惻惻也

徐州問黃樓已不可登矣

山氣開夕陽河聲轉孤郭
茲樓何蕭條斯人不可

作曠懷卻橫流深情寄華酌保障詎言勞遊宴未
爲虐彼哉不知憂亦竟不知樂

默深云起
結俱佳

東林寺

鐘鳴萬山裏響落萬山外尋聲入東林靜極冥諸
籟石泉左右流曲與真源會閒雲不離寺倚樹作
奇態老僧指殘碑茫然話興廢不見白蓮開久與
青松對

上庾嶺憩雲封寺拜張文獻公祠

南嶠昔未開兵爭向千載大矣唐相功蒙昧一朝

改妙識破天阻高文發地彩我行屬新秋平地陟
崔嵬杖底百蠻山一氣青到海古寺闢山脊挂角
有元解風定暗泉生雲去殘松在卻數南歸期梅
花儻吾待修存云奇景寫得出默深云杖底二句佳不必切曲江祠而自與泛景不同此詩之妙也

闡中作

聖人茲御宇首登賢能書日月照南海朱鵲吐祥
符我今奉使來榮過陸大夫昨日出都門良友送
登車珍重採梗楠毋徒採珊瑚珊瑚雖珍木棟梁

材不如

斯文自康莊昧者恆苦陷積習使之然豈不由操
鑑下士爭末榮恆情避衆賤苟非削羣蕪安能表
孤禱三更燭易殘五色目終眩掩卷下空階星月
同粲爛

由廣州至南雄舟行雜詩

壯哉此南行得見山水大天地將到海盡情逞雄
快五嶺屹門戶重洋表襟帶何怪老尉佗冠冕中
國外時往霸氣銷風變文明會七月下滇陽恩恩

觀大概歸帆不嫌遲一意搜靈怪

異雲起南海浮出金銀臺
鯨客首珠帕市門水上
開大風吹寶舟恂恂四
面來羽毛變錦繡泥土成
瓊瑰光氣燦爛中淫毒
爲之媒何時海水竭此市
乃罷哉

依依河之干肅肅門下士
感茲睠睠情離別意方
始國家待楨幹吾敢私
桃李各有天地身攀附
甯非耻緲緲羅浮雲暉
暉映紫水水上有至人
自稱白沙子一鼓碧玉琴
千載音未已

默深云各有
二句守己教

人之法皆
在其中

舟中何所有有橘三百丸切以金錯刀供之白玉
盤愛此香與色使我不能餐入粵秋已深不及荔
子丹霜中得嘉實相對如古歡荔好終苦熱何如

貞歲寒

慎伯云深情古調

已聞上峽來無端入山腹峽中更無天山水相結
束寺門動江光斜照紛在目偉哉翕闕氣富矣雲
雷蓄漸高聽已幽微風送鳴玉真源一飄灑光澤
徧草木感茲泉響深歎彼川流速老衲催客還一

燈出深綠

晚遊峽山寺坐
淙碧軒聽泉

索幽情難歇看山夜更好晚飯帶玉堂燈前萬峯
繞江光切虛空衆陰合窅窳風隨嶺樹定星落蠻
天小羣籟一寂中寸心千仞表歸去不成眠寒鐘
一舟悄

李侯江湖長游戲來炎方炎方一相見忽忽先我

行

李申耆先
十日發舟

思君不可絕駕舟趨滇陽滇陽復不

見追君至曲江孤蓬倚獨夜月墮江茫茫

慎伯云
潔淨精

深

我母寓武昌我父官武岡武岡至滇陽不及千里
疆遣奴來視兒慰藉增悽惶再拜遣奴歸還用慰
高堂夜來臥空舟忽復還家去武岡及武昌分明
一室聚宛轉鳴榔聲無端又驚寤晚帆山影中還
疑故鄉路

慎伯云轉韻道
健直登作者

水急不受舟半月灘行緩直泝江水盡始見江月
滿忽如素心人久別新到眼樹暗覺村深帆重知
山轉露華明可掇煙痕聚還展炎方久無秋此夕
興不淺

曲江聞劉芙初前輩死耗哭之以詩

一自成名後長爲失意人
歸非慕高隱天又奪閒身
執友傷遺稿孤兒累老親
生前憂菽水地下轉忘貧

送我南歸後君歸我不知
卻思前別日猶喜未衰時
至死果何病他生休作詩
淚揮江上水到海有餘悲

過桐城有懷汪均之兄弟

遠村入寒煙殘日搖野水
栖鳥各在林征鴻飛未

已卻望小龍山獨立無依倚中有故人居雲木冬
猶美豈知繁霜晨征輶再過此

壬午

三月十七日雨後偕蘭雪步至崇效寺看海

棠作

棗花寺在吾廬西海棠開時吾不知花田老農探
花早過門示我看花詩詩中說花得花髓萬朵仙
雲生筆底是時雨止塵不生曷往觀乎吾與子無
風無日衆緣圓不車不馬雙屐閒天時人事兩相

得信我與花俱有緣佛國樓臺高十丈花光迸出
樓臺上雨中纔落一分紅林下依然千步障精神
聚處生奇芬求之不得靜若聞淵材舊恨今頓釋
子固詎獨夸能文世閒萬事當及時輸君先看半
開枝我來已是十分滿寄語游人休再遲

癸未

題舍弟大雲黃鶴樓遠眺圖卽送其歸武昌
鬱鬱抱奇氣飄飄登此樓獨立天地外神仙安足
求仰瞻日月逝俯聽江漢流載誦邁征篇所思在

千秋

甲申

四十生日自懲詩

回憶孩提初依依只雙親言容有深愛樸然見本
真無端以養仕轉違昏與晨親年過七十兒亦閱
四旬衰顏貽辛苦豈不傷哉貧書來善慰藉枕畔
幾酸呻恩慈不能說貽穀益諄諄懍惟千里言珍
重百年身

百年去堂堂此身獨含愧束髮鄙浮澆趨庭勗遠

志悠悠積因循聰明盡文字枝葉日繁滋根本何
能遂暗室自推鞠愆尤千百累往者不可追來者
尤可惴勞勞聖賢心勉勉君父事先零與後凋須
識天地意默深云秋舫篤志求道屏棄詞章之學
讀此詩知涵養省察之功深矣蘭雪云
忠孝之心聖賢之志念天
地之悠悠獨愴然而泣下